

EDICION SPECIAL HIMNO Y BANDERA

E bestro yena cu cosnan di maldad

(Saca for di HOLA Aruba)

Na Aruba tambe tin hopi storianan di nos antepasadonan. Hopi di nantacasonan misterioso cu tin biaha ta inexplicabel. Aki por lesa un di e casonan aki cu un famia a yega di conta di loque nan a pasa aden.

Un famia cu a bay biba na un cas na Noord no por a pensa cu nan lo haya un aviso di un difunto di cosnan malo cu tabata pasa rond di e cas. E cas bieu cu tabata tin un bestro (wc di antes) tabata contene varios obhetonan straño den dje cu di un forma of otro a worde cendi na candela misteriosamente y caminda un difunto cu tabata bisña di e doñonan anterior a avisa e famia un dia promer cu tabata tin cosnan straño den e bestro.

E famia ta conta.

Un Diadomingo cu henter famia ta na cas disfrutando y descansando di dianan druk, diripiente ta tende un zonido straño patras di e cas y cu ta hala atencion di henter e famia. Esaki ta un zonido poco usual manera un porta cu a dal masha duro pafor.

E famia cu a caba di dreñta den e cas bieu aki cu tabata pertenece na un famia grandi di cual e wela cu a biba te ultimo den e cas tabata un curandero manera cu antes nos tabata yama esnan cu ta yuda cura hende y traha remedi di tera. E cabez di cas sinta den sofa disfrutando di un bon programa na television a dicidi di bay way wak ta di unda e zonido a bin. Di leu e tata a tira bista riba e bestro (baño) cu tin pafor cu ta pertenece na e cas, cual ta sera pa basta tempo na candal.


Desde cu nan a dreñta den

e cas no a haya tempo di habri esaki pasobra nan tabata ocupa cu mudamento ademas e ex doñonan a bisa cu eyden no tin nada solamente e wc cu ni ta funciona. Un cos si cu e famia a ripara cu e bestro ta basta bieu y tur kibra y isola di e cas pa medio di mondi cu ta rondone.

Bernardo a keda mira pafor tur caminda buscando di unda e zonido ta bin pero sin por a haya algo cu ta relaciona e zonido duro cu un rato prome el a scucha.

E cabez di cas ta draai su lomba pa bira bay bek den sofa caminda cu e tabata mira su programa preferi ora cu direpiante el a sinti un porta dal habri. Manera cu el a scucha e zonido aki el a draai su cara direccion e bestro pero a nota cu no ta esaki a habri ya cu e ta bon cera na candal.

E cos aki e homber no a compronde mucho bon y a dicidi di bay te na e porta di e bestro cu ta keda mey mey di mondi. E meneer a pasa man cu su slof y a cuminsa cana bay direccion di e bestro y diripiente di paden el a tende un stem ta yame na e porta di cas dilanti, caminda el a dicidi di bay wak ta ken ta na e porta dilanti y a laga e inspeccion di e bestro pa despues.



Na e porta di cas tabata para un homber di edad chiquito, cu un sombre bisti. E meneer di cas no por reconoce kende ta na e porta y a puntra e meneer: "Despensa mi conoce meneer?". E meneer a hisa su cara wak e doño di cas y a bise: "abo no pero ami si conoce bo." Manera cu e doño di cas a wak den wowo di e homber desconoci el a sinti un ril a coi su curpa pero el a reacciona puntrando: Di unda meneer conoce mi?

E shon para na e porta a bise: "Mi ta ruman homber di difunto Chichi cu tabata biba aki."

"Y kico mi por haci pa shon?". E shon di: "Mi a bin pasa cerca bo pa bisa bo cu ta bon pa bo no habri e porta di e bestro pasobra lo bo haya hala di djaca y otro bestianan indesea den dje y ta

mihor bashe gewoon abao."

E doño di cas cu na e momento no a comprende e mensahe a bisa e homber straño "Mi no tabata pensa di habri esaki, pero despues di tempo toch lo mi kier bay hacie pasobra si tin bestia mi ta bay caba cu esakinan prome cu nan dreñta cas". E Shon a conteste mesora: "Mi yiu haci mi caso, e bestro no ta sirbi pa nada mas y ta mihor bo bashe abao". E doño di cas a haya fastioso cu e shon a keda insisti pa e basha e bestro abao ya cu e no ta comprende e pakico pa hacie asina liher.

E ora ey e meneer a bisa e shon cu e ta desea pa e compaño pa e bestro pa e habri esaki y si enberdad esaki ta asina den mal estado y yena cu bestia e lo basha esaki abao. E shon a keda mira e doño di cas cu un cara rabia y cera.

E doño di cas a habri e porta pa e shon dreñta y a bise "Pasa paden shon, dreñta bebe un coffie". Prome cu nan a yega cushina e doño di cas a puntra e shon con e kier su cofie cu el a ripara cu e shon no tabata tey mas.

El a bay para na e porta y wak pafor pa mira unda e shon a bay pero ni holo di e shon. El a keda straña pasobra un shon grandi asina no por cana of core asina lihe bay.

Tur pensativo el a bay den camber cerca su famia cu hunto tabata drumi ta wak television.

E casa a puntre cu kende bo tabata papiando awor ey cu mi a scucha stem?

E homber a sinta riba cama y a bise cu un shon cu ta ruman di e difunto Chichi cu tabata doño di e cas a bin bishite y el a conta su casa henter e storia di e homber desconoci.

E casa mirando e television no a pone mucho interes den loke cu su casa tabata conte y a bise; "Kizas e lo bolbe". Y e famia a sigui wak television tranquil hunto.

Tabata e siguiente dia anochi laat un zonido duro a bolbe zona te cu el a lanta e yiu mas chiquito di e famia cu a dicidi di lanta for di cama pa bay bisa e tata di loke cu el scucha. Manera cu el a lanta for di su cama canando pa bay den gang pa e cuarto di su mayornan e sonido a bolbe hala su atencion.

E mucha cu tabata tin apenas 6 aña a dicidi di bay e mes para na e porta di cushina pa e wak di unda e zonido ta bin. Diripiente e zonido a bira mas fuerte y e mucha a alcanza wak pafor door di e bentana pa mira kico tabata pasando. El a mira

un candela tabata sali for di e bestro bieu cera y di biaha el a core bay cerca cu mayornan pa bisa na di e candela. Manera cu el a avisa su mayornan di e candela esakinan a core lanta di biaha y bay mira unda e candela ta. Enberdad e bestro tabata bao un vlam grandi di candela y leu a leu tabata tin zonido di explosion den dje.

E doño di cas a core pasa man cu slang y a cuminsa muha e bestro y diripiente el a mira e homber bieu cu a papia cune leu para for di e cas ta wak y a saluda esaki y a sak su cabez cana bay y desaparece den e scuridad di anochi.

Asombra y sin sa kico pa haci e homber a cuminsa grita su casa pa yama brandweer pasobra e candela tabata feroz y tabata parece cu ta explosion tin den e bestro. Manera cu e candela tabata birando mas grandi Bernardo para pafor tabata scucha con gritonan di alma malo tabata sali for di e bestro. E homber a kere cu e ta scuchando cosnan straño, pero en berdad tabata gritonan horibel e tabata scucha pasobra e muchanan paden tambe tabata spanta di e gritonan.

Den un par di minuut brandweer a yega y a constata e candela cu tabata azota e bestro. Den un frega di wowo esaki a wordo paga y ta solamente e resto di e bestro a keda.

Pero despues cu a paga e candela loque cu nan por a haya atras den e bestro ta cosnan asombroso. Den e restonan di e bestro a haya cadenan cu bo ta mara bestia, wesonan di cacho, cabrito, carpachi, pida di repchi cera tur den un caha di hero bieu cu no a kima y ta pa e motibo aki por a haya e wesonan.

Ademas a haya cruznan straño traha di hero, un monton di lampi, staka, cuchiuw cu simbolonan straño ariba nan, un hala di cadena cu simbolo di djabel para ariba etc.

Mas straño tabata e inicio di e candela y e shon cu Bernardo a cera conoci cune un dia prome tabata un shon cu despues di tempo Bernardo a bin tende cu a fayece masha aña caba y cu tabata un bisña di ey banda mes.

Kico tur e persona aki tabata tin di haci cu e candela y e advertencia pa no habri e bestro mas e anochi laat aki e tabata leu para ta mira e candela. Pa e famia esaki a keda un misterio y cu te cu awe ainda nan ta recorda sin sa pakico nan a worde avisa pa kima e bestro y kico lo por a sosode sin nan no a hacie.